

গণপ্রজাতন্ত্রী বাংলাদেশ সরকার  
জাতীয় রাজস্ব বোর্ড  
ঢাকা।

[ মূল্য সংযোজন কর ]

প্রজ্ঞাপন

ঢাকা, ২৮শে জ্যৈষ্ঠ, ১৪০৫ বাৎ/১১ ই জুন, ১৯৯৮ ইং।

এস.আর.ও, নং-১১৭-আইন/৯৮/১৭৮-মুসক।- মূল্য সংযোজন কর আইন, ১৯৯১ (১৯৯১ সনের ২২ নং আইন) এর ধারা ৪৬(২) এর সহিত পঠিতব্য ধারা ৭২ এ প্রদত্ত ক্ষমতাবলে জাতীয় রাজস্ব বোর্ড নিম্নবর্ণিত বিধিমালা প্রণয়ন করিল, যথা :-

১। সংক্ষিপ্ত শিরনামা।- এই বিধিমালা মূল্য সংযোজন কর পরামর্শক (লাইসেন্স) বিধিমালা, ১৯৯৮ নামে অভিহিত হইবে।

২। সংজ্ঞা।- বিষয় বা প্রসংগের পরিপন্থী কোন কিছু না থাকিলে, এই বিধিমালার -

- (ক) 'আইন' অর্থ মূল্য সংযোজন কর আইন, ১৯৯১ (১৯৯১ সনের ২২ নং আইন);
- (খ) 'একাডেমী' অর্থ স্কুল, আবগারী ও মূল্য সংযোজন কর প্রশিক্ষণ একাডেমী, চট্টগ্রাম;
- (গ) 'পরামর্শক' অর্থ এই বিধিমালার অধীনে লাইসেন্সপ্রাপ্ত মূল্য সংযোজন কর পরামর্শক;
- (ঘ) 'লাইসেন্স' অর্থ এই বিধিমালার অধীনে প্রদত্ত মূল্য সংযোজন কর পরামর্শক লাইসেন্স;
- (ঙ) 'বোর্ড' বলিতে, এই বিধিমালার উদ্দেশ্য পূরণকল্পে, তৎকর্তৃক ক্ষমতা প্রদত্ত কোন কর্মকর্তাও ইহার অন্তর্ভুক্ত হইবে।

৩। লাইসেন্সের জন্য আবেদন।- (১) বিধি ৪ এ উল্লিখিত যোগ্যতা সম্পন্ন যে কোন ব্যক্তি লাইসেন্সের জন্য বৎসরের যে কোন সময় এই বিধিমালার সহিত সংযুক্ত ফরম-ক তে বোর্ডের নিকট আবেদন করিতে পারিবেন।

(২) উক্ত আবেদন পত্রের সহিত নিম্নলিখিত কাগজপত্র দাখিল করিতে হইবে, যথাঃ-

- (ক) আবেদনকারীর দুই কপি পাসপোর্ট সাইজের ছবি ;
- (খ) শিক্ষাগত যোগ্যতা এবং প্রযোজ্য ক্ষেত্রে, অভিজ্ঞতার সমর্থনকারী সনদ বা অন্যান্য কাগজপত্রের সত্যায়িত অনুলিপি ;
- (গ) আবেদনকারী যে ইউনিয়ন বা পৌর এলাকার বাসিন্দা উহার চেয়ারম্যান বা প্রথম শ্রেণীর সরকারী কর্মকর্তা কর্তৃক প্রদত্ত নাগরিকত্বের সনদ ;
- (ঘ) বোর্ড কর্তৃক নির্ধারিত অংকের পোস্টাল অর্ডার/ব্যাংক ড্রাফট/পে-অর্ডার।

৪। আবেদনকারীর লাইসেন্স প্রাপ্তির যোগ্যতা ও অযোগ্যতা।—

- (১) লাইসেন্স প্রাপ্তির জন্য আবেদনকারীর নিম্নবর্ণিত যোগ্যতাসমূহ থাকিতে হইবে, যথাঃ—
- (ক) আবেদনকারীকে বাংলাদেশের নাগরিক হইতে হইবে ;
- (খ) আবেদনকারীর বয়স আবেদনের তারিখে অন্ততঃ পঁচিশ বৎসর হইতে হইবে;
- (গ) আবেদনকারীকে স্বীকৃত বিশ্ববিদ্যালয় হইতে যে কোন বিষয়ে স্নাতক ডিগ্রীধারী, অথবা কোন স্বীকৃত প্রতিষ্ঠান হইতে উত্তীর্ণ চার্টার্ড একাউন্টেন্ট বা কষ্ট একাউন্টেন্ট, অথবা মূল্য সংযোজন কর, শুদ্ধ কিংবা আয়কর বিভাগে প্রথম শ্রেণীর কর্মকর্তা হিসাবে পনেরো বছরের চাকুরীর অভিজ্ঞতা সম্পন্ন হইতে হইবে।
- (২) নিম্নবর্ণিত কোন ব্যক্তি লাইসেন্স পাওয়ার জন্য অযোগ্য বলিয়া বিবেচিত হইবেন, যথাঃ—
- (ক) সরকার বা কোন স্থানীয় কর্তৃপক্ষের অধীনে চাকুরীরত বা চাকুরী হইতে বরখাস্ত কোন ব্যক্তি ;
- (খ) এই বিধিমালার অধীনে ইতিপূর্বে যাহার লাইসেন্স বাতিল করা হইয়াছে এমন কোন ব্যক্তি।

৫। লাইসেন্স প্রদানের নিমিত্ত পরীক্ষা গ্রহন।—

- (১) সকল যোগ্য আবেদনকারীকে নিম্নলিখিত বিষয় সমূহের উপর, উহাদের ডান পার্শ্বে বর্ণিত পূর্ণ নম্বর অনুযায়ী, ১০০ নম্বরের লিখিত পরীক্ষায় অংশ গ্রহন করিতে হইবেঃ

(ক) মূল্য সংযোজন কর আইন, ১৯৯১	
(খ) মূল্য সংযোজন কর বিধিমালা, ১৯৯১	৬০
(গ) মূল্য সংযোজন কর সংক্রান্ত প্রজ্ঞাপন ও আদেশ সমূহ	
(গ) Customs Act, 1969	২০
(ঘ) আমদানী নীতি আদেশ (যখন যেই আদেশ বলবৎ থাকিবে)	
(ঙ) রপ্তানী নীতি আদেশ (যখন যেই আদেশ বলবৎ থাকিবে)	
(চ) The Foreign Exchange Regulation Act, 1947	২০।
(ছ) The Imports and Exports (Control) Act, 1950	

- (২) বোর্ডের নির্দেশনা অনুযায়ী উপরি-উক্ত সিলেবাসের ভিত্তিতে একাডেমী লিখিত পরীক্ষা, এবং ১০০ নম্বরের মৌখিক পরীক্ষা গ্রহন করিবে এবং পরীক্ষা সংশ্লিষ্ট যাবতীয় কার্যাদি সম্পাদন করিবে; লিখিত ও মৌখিক পরীক্ষায় পৃথকভাবে ন্যূনতম ৫০ শতাংশ নম্বর না পাইলে কোন আবেদনকারী লাইসেন্স পাইবার জন্য যোগ্য বিবেচিত হইবে না।

(৩) একাডেমী হইতে পরীক্ষার ফলাফল পাওয়ার পরে বোর্ড নির্বাচিত আবেদনকারীদের নাম বিজ্ঞাপিত করিবে এবং তাহা পত্রযোগে সংশ্লিষ্ট আবেদনকারীদেরও জানাইবে।

৬। লাইসেন্স প্রদান ও নবায়ন।- (১) বোর্ড তৎকর্তৃক নির্ধারিত ফরমে নির্বাচিত আবেদনকারীকে একটি লাইসেন্স প্রদান করিবে।

(২) লাইসেন্স প্রদানের তারিখ হইতে উহা তিন বৎসর বলবৎ থাকিবে এবং উক্ত মেয়াদ শেষ হওয়ার পূর্বে বা মেয়াদ শেষ হওয়ার পরে ত্রিশ দিনের মধ্যে নবায়নের জন্য আবেদন করা হইলে বোর্ড উহা নবায়ন করিতে পারিবে।

(৩) কোন পরামর্শক বিধি ৪ এর উপ-বিধি (২) তে উল্লিখিত অযোগ্যতা অর্জন করিয়া থাকিলে তাহার লাইসেন্স নবায়ন করা হইবে না।

(৪) লাইসেন্স নবায়নের জন্য পরামর্শক সাদা কাগজে একটি দরখাস্ত সহকারে মূল লাইসেন্স বোর্ডে দাখিল করিবেন এবং মেয়াদ শেষ হওয়ার ৬০ (ষাট) দিনের মধ্যে বোর্ড লাইসেন্সটি নবায়নকরতঃ উহা পরামর্শককে ফেরত দিবে, অন্যথায় উক্ত সময়ের মধ্যে লিখিত কারণ উল্লেখ পূর্বক লাইসেন্স নবায়ন না করার সিদ্ধান্ত তাহাকে জানাইয়া দিবে।

(৫) এই বিধির অধীনে লাইসেন্স নবায়নের জন্য উহার মূল কপি জমা দানের স্বীকৃতি স্বরূপ বোর্ড সংশ্লিষ্ট পরামর্শককে একটি রশিদ প্রদান করিবে এবং উপ-বিধি (৪) অনুসারে সিদ্ধান্ত না হওয়া পর্যন্ত উক্ত রশিদের ভিত্তিতে পরামর্শক তাহার কাজ চালাইয়া যাইতে পারিবেন।

(৬) উপ-বিধি (২) তে উল্লিখিত ত্রিশ দিনের পর লাইসেন্স নবায়নের দরখাস্ত করা হইলে এবং বিলম্বের কারণ সম্পর্কে সন্তুষ্ট হইলে বোর্ড উক্ত লাইসেন্স নবায়ন করিতে পারিবে।

৬। পরামর্শকের দায়িত্ব।- প্রত্যেক পরামর্শক আইন ও বিধি অনুসারে মূল্য সংযোজন কর এবং সংশ্লিষ্ট অন্যান্য বিষয়ে যথাসম্ভব সততা ও নিষ্ঠার সহিত তাহার দায়িত্ব পালন করিবেন এবং তাহার দায়িত্বের সূত্রে ইচ্ছাকৃতভাবে কোন কর্তৃপক্ষের বা অন্য কোন ব্যক্তির নিকট অসত্য বা বিকৃত তথ্য সরবরাহ করিবেন না বা ইচ্ছাকৃতভাবে কোন প্রয়োজনীয় তথ্য গোপন করিবেন না বা অনুরূপ পরামর্শ প্রদান করিবেন না।

৭। লাইসেন্স বাতিল।- বোর্ড যে কোন পরামর্শককে লিখিতভাবে কারণ দর্শানোর সুযোগ দিয়া তাহার লাইসেন্স বাতিল করিতে পারিবে এবং অনুরূপ বাতিলকরণের পূর্বে সাময়িকভাবে লাইসেন্সের কার্যকরতা স্থগিত কারিতে পারিবে; এইরূপ স্থগিতকরণের ক্ষেত্রে বোর্ড অনধিক ৯০ দিনের মধ্যে লাইসেন্স বাতিল করা বা না করার সিদ্ধান্ত গ্রহণ করিবে এবং বাতিলকরণের ক্ষেত্রে সিদ্ধান্ত পরামর্শককে লিখিতভাবে অবিলম্বে জানাইয়া দিবেন।

ফরম-ক

মূল্য সংযোজন কর পরামর্শক হিসাবে লাইসেন্স প্রাপ্তির আবেদন পত্র  
(বিধি ৩(১) দ্রষ্টব্য)

- ১। আবেদনকারীর নাম :
- ২। পিতা/স্বামীর নাম :
- ৩। বর্তমান ঠিকানা :
- ৪। স্থায়ী ঠিকানা :
- ৫। জন্ম তারিখ :
- ৬। শিক্ষাগত যোগ্যতা [ শিক্ষা প্রতিষ্ঠানের নাম, পরীক্ষার নাম, বোর্ড, পাশের বৎসর, প্রাপ্তবিভাগ উল্লেখসহ ] :
- ৭। মূল্য সংযোজন কর বিভাগে প্রথম শ্রেণীর চাকুরীর অভিজ্ঞতা থাকিলে উহার বিবরণ :
- ৮। (ক) আবেদনকারী ইতিপূর্বে কোন সরকারী বা স্থানীয় কর্তৃপক্ষের চাকুরী হইতে বরখাস্তকৃত হইয়াছেন কিনা অথবা বর্তমানে চাকুরীরত আছেন কিনা ;  
(খ) লাইসেন্সধারী হইয়া থাকিলে তাহার লাইসেন্স বাতিল/স্থগিত হইয়াছে কিনা ;
- ৯। এই আবেদনে বর্ণিত সকল তথ্য সত্য ও সঠিক।

তারিখঃ .....

- আবেদনকারীর স্বাক্ষর।

জাতীয় রাজস্ব বোর্ডের আদেশক্রমে,

[ আহমেদ মুনিরুহ সাহেবীন ]

দ্বিতীয় সচিব

মুসক-নীতি নির্ধারণ ও বাজেট